

[Ebonis archiepiscopi de restitutione sua.]

fol. 117.

Omnes homines imperii huius et ultra sciunt in veritate, quanta mala pro peccatis nostris creverunt in isto nostro tempore, ita ut nullus remaneret pauper nec dives homo, quem ipsa non affligeret perturbatio. Divites nullam habuerunt requiem, pauperes multam passi sunt oppressiōnem, in orphanis et viduis nulla fuit misericordia, in ecclesiis vero plurimisque aliis locis perpetrata sunt homicidia multaue incendia, et sic a multis diebus vix ullo loco dominationis huius vera servata est iustitia, dum rarissimi sunt qui de Christiana pace ullam habeant curam aut ecclesiarum Dei reverentiam. Propter quod et multi potentes expulsi sunt de patria, episcopi vero et alii sacerdotes missi in exilio atque custodia, unde et plurima in religione Christiana perpetrata sunt scelera. Hinc igitur exortae sunt inter principes irae, rixae, dissensiones atque insidiae, sicut scriptum est de ipsis, *'qui loquuntur pacem cum proximo suo, male autem in cordibus eorum'*¹. De quibus et terribilis illa divinitus prae-nuntiata iam² quasi regnat miseria³, dicente Domino de novissimo ac perituro hoc saeculo: *'Tradet autem frater fratrem in mortem et pater filium et insurgent filii in parentes'*⁴, ac cetera formidanda, quaeque rex regum et dominus dominantium de ruina iniqui mundi prae-nuntiat, ut omnes fideles suos ab amore mundano reprimat, quia scriptum est: *'Qui amicus fuerit huius mundi, inimicus Dei reputabitur'*⁵. Quibus ergo prospectis omnibus praesentibus periculis scilicet vel aeternis omnes fideles vel amicos Dei et maxime carissimos meos suadeo et hortor, ut si non melius, tamen, sicut ego talibus in angustiis secundum consilium sanctarum scripturarum feci, ita et unusquisque in tribulationibus facere non negligat, ut omne malum pro peccatis nostris divinitus promissum vel ostensum sibi poenitendo convertat in bonum, ne sicut stultus ac

*fol. 117'. reprobus *obdurato corde inter divina flagella murmurando pereat, sed magis compunctus remissionem peccatorum adquirat, quia scriptum est: *'Contritum cor et humiliatum Deus non despiciet'*⁶, et iterum: *'Nolo mortem peccatoris, sed ut convertatur et vivat'*⁷, et non sicut de stultis et reprobis dictum est fiat, dicente Domino: *'Percussi eos et non receperunt disciplinam'*⁸. Felix utique homo ille notatur, quem Deus in hac vita castigare dignatur, ne maioribus poenis servatus

1) Psalm. 27, 3. 2) 'ian' Hs. 3) corr. aus 'misericordia' Hs.
 4) Matth. 10, 21. 5) Vgl. Jacob. 4, 4. 6) Psalm. 50, 19. 7) Vgl.
 Ezech. 18, 23. 33, 11. 8) Vgl. Jerem. 2, 30.